

Definitionibus ecclesiasticorum dogmatum. Qui error insignis aliquot viros etiam inuoluit, uidelicet Lactantium, Victorinum, Seuerum, è Græcis Irenæum & Apollinarium, ceu Hieronymus autor est exponens Ezechielis caput xxxvj. Hos quidam Millarios uocant. Opus uero de spe fidelium, in quo uerisimile est hoc ab illo astrui, hodie non extat, citatur tamen à Hieronymo loco quo diximus. Porro huius libri nonnulla capita reperiuntur in uolumine quod scripsit aduersus Iudæos, quædam in libro de carne CHRISTI, ut nescias an hinc illuc transtulerit, an ediuerso. Habebat aut olim eruditi certos locos paratos, quibus ubilibet uti poterat, si exigeret materia.

Q. SEPTIMII FLOREN

TIS TERTVLLIANI, AD
VERSVS MARCIONEM
LIBER TERTIVS.



SECUNDVM uestigia pristini operis quod amissum reformare perseueramus, iam hinc ordo de CHRISTO, licet ex abundantia, post decursam defensionem unicæ diuinitatis. Satis etenim præiudicatum est, CHRISTVM nõ alterius dei intelligendum, quàm creatoris, cum determinatum est, alium deum nõ credendum præter creatorem, quem adeo CHRISTVS prædicauerit, & deinceps Apostoli non alterius CHRISTVM annunciauerint, quàm eius dei quem CHRISTVS prædicauit, id est creatoris, ut nulla mentio alterius dei, atque ita nec alterius CHRISTI agitata sit, ante scandalum Marcionis. Facillime hoc probatur Apostolicarum & hæreticarum ecclesiarum recensu: illic scilicet pronũciandam regulæ interuersionem, ubi posteritas inuenitur. Quod etiam primo libello* intexuisset & nunc con-

gressio ista seorsum in CHRISTVM examinatura, eo utique proficiet, ut dum CHRISTVM probamus creatoris, sic quoque deus Marcionis excludatur. Decet ueritatem totis uiribus uti suis, non ut laborantem. Cæterum in præscriptionum compendijs uincit. Sed decretum est ut gestientem ubique aduersario occurrere, in tantum furenti, ut facilius præsumpserit eum uenisse CHRISTVM, qui nunc sit annunciat, quàm eum qui semper sit prædicatus. Hinc denique gradum consero, an debuerit tam subito uenisse. Primo, quia & ipse dei sui filius, hoc enim ordinis fuerit, ut ante pater filium profiteretur, quàm patrem filius: & ante pater de filio testaretur, quàm filius de patre. Dehinc & qua missus præter filij nomen. Proinde enim præcessisse debuerat mittentis patrocinium in testimonium missi, quia nemo ueniens ex alterius autoritate, ipse eam sibi ex sua affirmatione defendit, sed ab ipsa defensionem potius expectat, præeunte suggestu eius, qui autoritatem

r præstat.

Fort. * intexui. Sed
nunc.